

A Festa di a Nazione

E Korsika e vez daou zevezh gouel broadel. D'ar 14 a viz Gouere, evel e pep lec'h war tiriad ar Republik c'hall... Korsiz avat, o deus ivez o gouel broadel lidet bep bloaz. Hag estreget ar vroadelourien a zouj outañ, daoust ma n'eo ket ofisiel. D'an 8 a viz Kerzu emañ. Sed aze istor *A Festa di a Nazione*.

Skritell un devezh-studi aozet d'an 8 a viz Kerzu e Skol-veur Pasquale Paoli, e Corti. E-kichen, un delwenn e koun Pasquale Paoli, *u Babbu di a Patria*, "Tad ar vammvro", e kumun Lisula (l'Île-Rousse e galleg).



Pep gwir miret strizh.



© Naelys / Shutterstock.com

dav eo souzañ pellik a-walc'h en amzer, en 18^{vet} kantved. D'ar mare-hont e oa Korsika dindan veli Genova. E dibenn 1730 e oa bet un emsavadeg ha skarzhet kuit an ac'huberien. E penn ar jeneraled korsat e oa tad Pasquale Paoli, an hini a zeuio da vezañ "tad ar vro" e Korsika. E-pad un nebeud bloavezhioù e klaskas Genova adtapout an enezenn gant sikour Frañs hag Aostria, met kazeg. E miz Genver 1735 e voe sinet un emglev a zieube Korsika diouzh Genova. D'an 30 a viz Genver e voe savet un doare bonreizh, ar pezh a vo diazezoù an hini wir kalz diwezhatoc'h. D'ar poent-se e voe divizet kaout ur c'han broadel a zo anvet *Dio vi Salvi Regina*, ur c'han relijiel en enor d'ar werc'hez Mari. Ha lakaat a rejont Korsika dindan Warez ar Werc'hez Vari a vez lidet bep 8 a viz Kerzu, setu perak e vez lidet d'an deiz-se.

➔ SELL ISTOROURIEN ZO

Istorourien zo ne gredont ket kement-se en istor-se rak n'en doa ket an 8 a viz Kerzu ur pouez kreñv er boblañs e deroù an 18^{vet} kantved. N'eo nemet e 1854 e voe choazet lakaat da lidañ deiz Itron Varia Krouet Dinamm d'an 8 a viz Kerzu gant ar pab Pi IX goude kantvedoù a dabutoù e-diabarzh an Iliz. Ar pezh a gont a-benn ar fin eo ez eo bet adkemeret en eil hanterenn an 20^{vet} kantved gant ar vroadelourien. Ha bez' eo an digarez da implijout an deiziad evel un arouez politikel, rak koshoc'h eo gouel broadel Korsika eget hini Frañs.

➔ PENAOS EMAÑ KONT HIZIV ?

Aze emañ ar pep dedennusañ e-keñver ar gouel-se. N'eo ket evel e Breizh d'an 19

a viz Mae da skouer, met n'eo ket evel hini Frañs kennebeut. Da lâret eo n'eo ket un devezh vak en ur mod ofisiel met ober a ra tud zo evel pa vefe unan. E 2010 o doa kinniget izili Corsica Libera ur mellad da Vreujoù Korsika evit ma vefe un deiz ofisiel en o bro ha ne vefe ket skol d'an deiz-se. Ne oa ket bet votet. Neoazh, n'eus kentel ebet en deiz-se e skol-veur Corti, Skol-veur Pasquale Paoli, skol-veur nemeti Korsika (prezegenoù a vez en deiz-se avat, digor d'an holl, diwar-benn ar vroad). N'eo ket souezh kement-se. Lidoù a vez e pep korn eus an enezenn. Gant embregerezhioù zo ne vez ket labouret da skouer. Evit ar vroadelourien eo un devezh pouezus-kenañ. Evit ar re all ez eo un digarez evit lidañ yezh ha sevenadur ar vro. Ar pezh a vez graet dre atalieroù en holl skolioù, da skouer.

Maksim Touzé